


遠秘書

全唐詩話

第廿集

庫文閣內			
三七一函	一七八冊	三一六號	漢書類



內閣文庫	
番號	漢 3160
冊數	178 (60)
函號	371 2



全唐詩話卷之三

牛僧孺

樂天夢得有除夜詩僧孺和云惜歲歲今盡少年
應不知淒涼數流輩歡喜見孫兒暗減一身力潛
添滿鬢絲莫愁花笑老花自幾多時

元和三年宣政殿試賢良方正能直言極諫科一
十人登科其後僧孺李宗閔王起賈餗四人皆相
次拜相先是白居易在翰林為考校官後僧孺罷

全唐詩話 卷三
相出鎮揚州居易在洛中有詩云北闕至東京風
光十六程坐移丞相閣春入廣陵城紅旆擁雙節
白鬚無一莖萬人開路看百吏立班迎闔外君彌
重罇前我亦榮何須身自得將相是門生

公始至京置琴書灞澆間先以所業謁韓文公皇
甫員外二公披卷卷首有說樂二章未閱其詞遽
曰且以拍板爲什麼對曰樂句二公相顧大喜曰
期高文必矣公因謀所居二公良久曰可於客戶

坊稅一廟院公如所教二公復誨之曰某日可遊
青龍寺薄暮而歸二公共日聯鑣至彼因大書其
門曰韓愈皇甫湜同謁幾官先輩不遇翌日輦轂
名士咸往觀焉奇章之名由是赫然矣或云僧孺
登第與同輩登政事堂宰相曰掃廳奉候

樂天求箏於維揚僧孺先有詩曰但愁封寄去魔
物或驚禪樂天云會教魔女弄不動是禪心樂天
云思黯自誇前後服鍾乳三千兩而歌舞之妓甚

多乃謔予衰老故答思黯詩云鍾乳三千兩金釵
十二行妬他心似火欺我鬢如霜慰老資歌笑銷
愁仰酒漿眼看狂不得狂得且須狂奇章又有詩
云不是道公狂不得恨公逢我不教狂

李紳

紳初以古風求知於呂溫溫見齊煦誦憫農詩曰
春種一粒粟秋收萬顆子四海無閒田農夫猶餓
死鋤禾日當午汗滴禾下土誰知盤中飧粒粒皆

辛苦又曰此人必爲卿相果如其言

紳字公垂中書令敬玄孫號短李穆宗召爲翰林
學士與李德裕元稹同時號三俊武宗時爲相居
位四年出鎮淮南卒

憶夜直金鑾奉詔承旨詩云月當銀漢玉繩低深
聽簫韶碧落齊門壓紫垣高綺樹閣連青瑣近丹
梯墨宣外渥催飛詔草定新恩促換題明日獨歸
花路近可憐人世隔雲泥

劉禹錫

長慶中元微之夢得韋楚客同會樂天舍論南朝
興廢各賦金陵懷古詩劉滿引一杯飲已卽成曰
王濬樓船下益州金陵王氣黯然收千尋鐵鎖沉
江底一片降幡出石頭人世幾回傷往事山形依
舊枕寒流而今四海爲家日故壘蕭蕭蘆荻秋白
公覽詩曰四人探驪龍子先獲珠所餘鱗爪何用
耶於是罷唱

元和十年自朗州召至京戲贈看花君子云紫陌
紅塵拂面來無人不道看花回玄都觀裏桃千樹
盡是劉郎去後栽

再遊玄都觀絕句并序云余貞元二十一年爲屯
田郎時此觀未有花是歲出牧連州貶郎州司馬
居十年召至京師人人皆言有道士手植僊桃滿
觀如紅霞遂有前篇以志一時之事旋又出牧今
十有四年復爲主客郎中重遊玄都蕩然無復一

樹惟兔葵燕麥動搖春風耳因再題二十八字以
俟後遊時太和二年三月也詩云百畝中庭半是
苔桃花淨盡菜花開種桃道士歸何處前度劉郎
今又來

禹錫嘗對賓友每吟張博士籍詩云藥酒欲開期
好客朝衣暫脫見閑身對花木則吟王右丞詩云
興闌鳴鳥換坐久落花多白二十二好余秋水詠
云東屯滄海濶南瀼洞庭寬余自知不及韋蘇州

春潮帶雨晚來急野渡無人舟自橫嘗過洞庭雖
爲一篇思杜員外落句云年去年來洞庭上白蘋
愁殺白頭人鄙夫之言有愧於杜公也楊茂卿校
書過華山詩曰河勢崑崙遠山形菡萏秋此實爲
佳句

白樂天任杭州刺史携數妓還洛陽後却還錢塘
故禹錫戲答云其那錢塘蘇小小憶君淚點石榴
裙沈存中曰禹錫霓裳羽衣曲云三鄉陌上望僊

山歸作霓裳羽衣曲又王建詩云聽風聽雨作霓裳樂天詩注云開元中西涼府節度使楊敬述造鄭愚津陽門詩注云葉法善嘗引上入月宮聞仙樂及上歸但記其半遂於笛中寫之會西涼府都督楊敬述進婆羅門曲與其聲調相符遂以月中所聞爲散序用敬述所進爲其腔而名霓裳羽衣曲說各不同今蒲州逍遙樓楣上有唐人橫書類梵字相傳是霓裳譜字訓不通莫知是非或謂今

燕部有獻僊音曲乃其遺聲然霓裳本謂之道調法曲今獻僊音乃小石調耳未知孰是

山圍故國周遭在湖打空城寂寞迴淮水東邊舊時月夜深還過女墻來樂天掉頭苦吟歎賞良久曰石頭詩云潮打空城寂寞迴吾知後之詩人不

復措辭矣

禹錫金陵五題自序云

禹錫字夢得附叔文擢度支員外郎人不敢斥其名號二王劉柳憲宗立禹錫貶連州未至斥朗州

司馬作竹枝詞武元衡初不為宗元所喜自中丞
 下除右庶子及是執政禹錫久落魄乃作問大鈞
 謫九年等賦又敘張九齡事為詩欲感諷久之召
 還宰相欲任南省郎乃作玄都觀看花君子詩當
 路不喜出為播州易連州徙夔州由知州刺史入
 為主客郎中復作遊玄都觀詩有兔葵燕麥之語
 聞者益薄其行俄分司東都裴度薦為集賢學士
 度罷出刺蘇州徙汝同二州會昌朝檢校禮部尚

書卒

故國思如此若為天外心

寄白公句

湖上收宿雨

句故

人日已遠窗下塵滿琴坐對一樽酒恨多無力斟

幕疎螢色迴露重月華深萬境與羣籟此時情豈

任

無題

禪思何妨在玉琴真僧不見聽時心秋堂境

寂夜將半雲去蒼梧湘水深

聽琴

右張為取作主客

圖

夢得曰柳八駁韓十八平淮西碑云左養右粥何

如我平淮西雅云仰父俯子韓碑兼有帽子使我
爲之便說用兵伐叛矣夢得曰韓碑柳雅余爲詩
云城中晨雞喔喔鳴城中鼓角聲和平美愬之入
蔡城也須臾之間賊無覺者又落句云始於元和
十二載重見天寶昇平時以見平淮之年

陳潤

送駱徵君云野人膺辟命溪上掩柴扉黃卷猶將
去青山豈更歸馬留苔蘚迹人脫薜蘿衣他日相

思處天邊望少微

潤大曆間人終坊州郿城縣令樂天之外祖也丈
夫不感恩感恩寧有淚心頭感恩血一滴染天地
右張爲取作主客圖

賈島

島字浪先范陽人初爲浮屠名無本能詩獨變格
入僻以矯艷於元白來洛陽韓愈教爲文去浮屠
舉進士終普州司戶島久不第吟病蟬之句以刺

公卿或奏島與平曾等爲十惡逐之詩曰病蟬飛
不得向我掌中行折翼猶能薄酸吟尚極清露華
疑在腹塵點誤侵睛黃雀并烏鳥俱懷害爾情大
中末授遂州長江簿初之任屆東川守者厚禮之
島獻感恩詩曰匏革奏終非獨樂軍城未曉啓重
門何時却入三台貴此日空知八座尊羅綺舞間
收雨點貔貅闔外卷雲根逐遷屬吏隨賓列撥掉
扁舟不忘恩自長江遷普州司倉方干自鏡湖寄

詩曰亂山重復疊何處訪先生豈料多才者空垂
不第名閒曹猶得醉薄俸亦勝耕莫問吟詩苦年
年芳草平島至老無子因啖牛肉得疾終於傳舍
島詩有警句韓退之喜之其渡桑乾詩曰客舍并
州三十霜歸心日夜憶咸陽無端更渡桑乾水却
望并州是故鄉

又赴長江道中詩曰策杖馳山驛逢人問梓州長
江何日到行客替生愁晉公度初立第於街西興

化里鑿池種竹起臺榭島方下第或以爲執政惡
 之故不在選怨憤題詩曰破却千家作一池不栽
 桃李種薔薇薔薇花落秋風起荆棘滿庭君始知
 皆惡其不遜島爲僧時洛陽令不許僧午後出寺
 島有詩云不如牛與羊猶得日暮歸韓愈惜其才
 俾反俗應舉貽其詩云孟郊死葬北邙山日月星
 辰頓覺開天恐文章中斷絕再生賈島在人間由

是振名

或曰非退之詩

題杜司戶亭子云狀頭枕是溪邊石井底泉通竹
 下池宿客未眠過夜半獨聞山雨到來時

題李欵幽居云閒居少隣並草徑入荒村鳥宿池
 中樹僧敲月下門過橋分野色移石動雲根暫去
 還來此幽期不負言

哭孟郊云身死聲名在多應萬古傳寡妻無子息
 破宅帶林泉塚近登山道詩隨過海船故人相弔
 處斜日下寒天

夜半長安雨燈前越客吟贈吳處士句島嶼夏雲起汀

洲芳草深句秋風吹渭水落葉滿長安句山鍾夜

渡空江水汀月寒生古石樓句舊國別多日故人

無少年句

李正封

唐文皇好詩大和中賞牡丹上謂陳修巳曰今京
邑人傳牡丹詩誰為首修巳對曰中書舍人李正
封詩天香夜染衣國色朝酣酒時楊妃侍上曰粧

臺前宜飲以一紫金盞酒則正封之詩見矣

退之正封從軍有晚秋郾城聯句詩正封云從軍

古云樂談笑青油幕燈明夜觀碁月暗秋城柝遂

為警策

正封字中護終監察御史

崔護

護字殷功貞元十二年登第終嶺南節度使

沈存中云唐人以詩主人物故雖小詩莫不極工

而後已所謂旬鍛月鍊者信非虛言小說護題城南詩其始曰去年今日此門中人面桃花相映紅人面不知何處去桃花依舊笑春風後以其意未全語未工改第三句曰人面祇今何處去至今所傳有此兩本惟本事詩作祇今何處在唐人作詩大率如此雖有兩今字不恤也取語意為主耳後人以其有兩今字故多行前篇

筆談

張又新

又新字孔昭薦之子附逢吉罷貶汀州刺史又附李訓訓死復坐貶終左司郎中

時號又新張三頭謂進士狀頭宏詞敕頭京兆解頭又新嘗作廣陵從事有佐酒妓每致情焉後二十年罷江南郡舟道廣陵適李紳鎮淮南又新方懼其讐已而又遇風漂沒二子紳憫然復書曰端溪不讓之辭愚罔懷怨荆浦沉淪之事鄙實憫然宴遇殊厚前所謂酒妓者猶在席又新以指染酒

卽席爲詞曰雲雨分飛二十年當時求夢不曾眠
今來頭白重相見還上襄陽玳瑁筵李卽命妓歌
以送酒

柳公權

公權武宗朝在內庭上嘗怒一宮嬪久之旣而復
召謂公權曰朕怪此人若得學士一篇當釋然矣
目御前蜀牋數十幅授之公權略不佇思而成一
絕曰不分前時忤主恩已甘寂寞守長門今朝却

得君王顧重入椒房拭淚痕上大悅令宮人上前
拜謝之

文宗時克翰林學士從幸永安宮苑中駐驛謂公
權曰我有一喜事邊上衣賜久不及時今年二月
給春衣訖公權前奉賀上曰可賀我以詩宮人迫
其口進公權應聲曰去歲雖無戰今年未得歸皇
恩何以報春日得春衣上悅激賞之

文宗夏日與諸學士聯句曰人皆苦炎熱我愛夏

日長公權續曰薰風自南來殿閣生微涼諸學士屬和帝獨諷公權兩句辭清意足不可多得乃令公權題於壁上字方圓五寸帝觀之歎曰鍾王復生無以加矣

公權字誠懸卒於太子太保

陸鴻漸

太子文學陸鴻漸名羽其先不知何許人景陵龍蓋寺僧姓陸於堤上得初生兒收育之遂以陸爲

氏及長聰俊多聞學瞻詞逸談諧辯捷性嗜茶始創煎茶法至今鬻茶之家陶爲其像置於湯器之間云宜茶足利至大和中復州有一老僧云是陸僧弟子常諷其歌云不羨黃金罍不羨白玉杯不羨朝入省不羨暮入臺唯羨西江水長下金陵城下來鴻漸又撰茶經三卷行於代今爲鴻漸形因目爲茶神有售則祭之無則以釜湯沃之

章孝標

孝標元和十三年下第時輩多爲詩以刺主司獨
孝標爲歸燕詩留獻侍郎庾承宣得詩展轉吟諷
庾重典禮曹孝標來年登第詩云舊壘危巢泥已
落今年故向社前歸連雲大厦無棲處更向誰家
門戶飛孝標及第除正字東歸題杭州樟亭驛云
樟亭驛上題詩客一半尋爲山下塵世事日隨流
水去紅花還似白頭人初成落句云紅花真笑白
頭人改爲還似且曰我將老成名似我芳艷詎能
久乎及還鄉而逝或曰前有八元後有孝標皆桐
廬人復同姓而皆不達

李紳鎮揚州請孝標賦春雪詩命題於臺盤上孝
標唯然索筆一揮云六出飛花處處飄粘窓拂砌
上寒條朱門到晚難盈尺盡是三軍喜氣銷

長安秋日云田家無五行水旱卜蛙聲牛犢乘春
放兒孫候暖耕池塘烟未起桑柘雨初晴歲晚香

醪熟村村自送迎

右二詩韋莊
又玄集取之

施肩吾

肩吾洪州人元和十年登第以洪州西山羽化之地慕其真風高蹈於此為詩奇麗著百韻山居詩才情富贍如荷翻紫蓋搖波面蒲瑩青刀挿水湄又烟粘薜荔龍鬚軟雨壓芭蕉鳳翅垂

隋曲有疎勒鹽唐曲有突厥鹽阿鵲鹽或云關中人謂好為鹽故肩吾詩云顛狂楚客歌成雪媚嫵吳娘笑是鹽蓋當時語也今杖鼓譜中尚有鹽杖

聲

孟簡

元和中簡將試詣日者卜之曰近東門坐即得之矣既入即坐西廊迫晚忽得疾隣坐請與終篇見其姓即東門也乃擢上第

簡字幾道德州人元和中為戶部侍郎以贓貶後以太子賓客分司卒尤工詩尚節義

張肅遠

觀燈云十萬人家火燭光門門開處見紅妝歌鍾
喧夜更漏暗羅綺滿街塵土香星宿別從天畔出
蓮花不向水中芳寶釵驟馬多遺落依舊明朝在
路傍

肅遠元和進士登第與舒元興聲價俱美

出廣
撫言

秦雲寂寂僧還定盡日無人鹿遶牀

句

日暮風吹

官渡柳白鴉飛出石墻頭

廢城
句

雙雙白燕入祠堂

乳石洞玉
女祠句

右張為取作主客圖

許康佐

元稹酬許五康佐詩云猿啼三峽雨蟬報兩京秋
珠玉慚新贈芝蘭忝舊遊他年問狂客須向老農
求

康佐以中書舍人為翰林侍講學士與王起皆為
文宗寵禮帝讀春秋至闔殺吳子餘祭問闔何人
耶康佐以中官方強不敢對帝嬉笑後問李訓訓
曰國君不近刑人以為輕死之道帝曰朕近刑人

多矣得不慮哉訓曰列聖知而不能遠惡而不能去陛下念之宗廟福也於是內謀剪除矣康佐終禮部尚書

張南史

陸滕宅秋雨中探韻云同人永日自相將深竹閒園偶辟強已被秋風教憶鱸更聞寒雨勸飛觴歸心莫問三江水旅服徒沾九月霜醉裏欲尋騎馬路蕭條幾處有垂楊

南史字季直幽州人以試叅軍避亂居揚州再召未赴而卒

徐凝

范攄言樂天爲杭州刺史令訪牡丹獨開元寺僧惠澄近於京師得之植於庭時春景方深惠澄設油幕覆其上會凝自富春來未識白先題詩曰此花南地知難種慚愧僧閒用意栽海燕解憐頻睥睨胡蜂未識更徘徊虛生芍藥徒勞妬羞殺玫瑰

不敢開惟有數苞紅萼在含芳直待舍人來白尋
到寺看花乃命徐同醉而歸時張祐傍舟而至二
生各希首薦白曰二君論文若廉藺之鬪鼠穴勝
負在於一戰也遂試長劔倚天外賦餘霞散成綺
詩試訖解送凝爲元祐次耳祐曰祐詩有地勢遙
尊嶽河流側讓關又題金山寺詩曰樹影中流見
鐘聲兩岸聞雖綦母潛云塔影挂青漢鐘聲和白
雲此句未爲佳也凝曰美則美矣爭如老夫今古

長如白練飛一條界破青山色凝遂擅場祐歎曰
榮辱糾紛亦何常也遂行歌而邁凝亦鼓柁而歸
自是二生不隨鄉賦矣白又以祐宮詞四句皆數
對未足奇也後杜牧守秋浦與祐爲詩酒友酷吟
祐宮詞以白有非祐之論常不平之乃爲詩以高
之曰睫在眼前人不見道於身外更何求誰人得
似張公子千首詩輕萬戶侯又曰如何故國三千
里虛唱歌詞滿六宮杜盛言其美者欲以苟異於

白而曲成於張也故牧又著論言近有元白者喜
 為淫言媠語鼓扇浮囂吾恨方在下位未能以法
 治之斯亦敷佐於祐耳潘若冲郡閣雅淡云凝官
 至侍郎多吟絕句曾吟廬山瀑布贈炙人口又題
 處州縉雲山黃帝上昇之所鼎湖蓋黃帝鑄鼎處
 也有池在山頂詩云黃帝旌旗去不回空餘片石
 碧崔嵬有時風捲鼎湖浪散作晴天雨點來自後
 無敢題者凝送馬向遊蜀云遊子去咸京巴山萬

里程白雲連鳥道青壁遞猿聲雨露經泥坂烟花
 帶錦城工文人共許應記蜀中行

青山舊路在別白首醉還鄉公句試到第三橋便入
 千頃花

宿列上人房云浮生不定若蓬飄林下真僧偶見
 招覺後始知身是夢更聞寒雨滴芭蕉

令狐楚

楚自翰林學士拜相子綯自湖州召入翰林為學

士間歲拜相渭南尉趙嘏獻詩曰鶚在卿雲冰在壺代天才業奉訐謨榮同伊陟傳朱戶秀比王商入畫圖昨夜星辰回劔履前年風月滿江湖不知機務時多暇猶許詩家屬和無

張仲素

桂魄初生秋露微輕羅已薄未更衣銀箏夜久殷勤弄心怯空房不忍歸

送春辭云日日人空老年年春更歸相歡在樽酒

不用惜花飛

閨人思云愁見遊空百丈絲春風惹斷更傷離閒花落遍蒼苔地盡日無人誰得知

仲素字繪之建封之子憲宗以仲素段文昌爲翰林學士韋貫之曰學士所以備顧問不宜專取辭藝罷之後終中書舍人

郎士元

送張南史云雨餘深巷靜獨釣送殘春車馬雖嫌

僻鶯花不棄貧蟲聲粘戶網鼠跡印牀塵借問山
陽會如今有幾人

士元字君胄中山人寶應中選畿縣官詔試中書
補渭南尉歷拾遺郢州刺史

高仲武云士元員外河岳英奇人倫秀異自家刑
國遂擁大名右丞已後與錢郎于長自丞相以下
出使作牧二公無詩祖餞時論鄙之兩公詞體大
約欲同就中郎公稍更閒雅近於康樂如荒城背

流水遠雁入寒林又去鳥不知倦遠帆生暮愁又
蕭條夜靜邊風吹獨倚營門望秋月可齊衡古人
掩映時輩又暮蟬不可聽落葉豈堪聞古人謂謝
眺工於發端比之於今有慚沮矣

送彭將軍云雙旌漢飛將萬里授橫戈春色臨關
盡黃雲出塞多鼓鼙悲寂寞烽火隔長河莫斷陰
山路天驕已請和

于良史

春山夜月云春來多勝事賞翫夜忘歸掬水月在
手弄花香滿衣興來無遠近欲去惜芳菲南望鐘
鳴處樓臺深翠微

冬日寄李贊府云地際朝陽滿天邊宿霧收風兼
殘雪起河帶斷水流北闕馳心極南圖尚旅遊登
臨思不已何處得銷憂

閒居寄薛據云隱几讀黃老閒齋耳目清僻居人
事少多病道心生雨洗山林溼鴉鳴池館晴晚來
因廢卷行樂至西城
高仲武云良史詩清雅工於形似如風兼殘雪起
河帶斷水流吟之未終較然在目

舒元興

大和九年誅王涯等仇士良愈專恣文宗惡之雖
登臨遊幸未嘗爲樂或瞠目獨語左右莫敢進問
因題詩曰輦路生春草上林花滿枝憑高何限意
無復侍臣知一日看牡丹或吟曰拆者如語含者

如咽俯者如愁仰者如悅吟罷方省元輿詞不覺
歎息泣下沾衣

李賀

杜牧之序其文集云賀字長吉元和中韓吏部亦
頗道其歌詩雲煙綿聯不足爲其態也水之迢迢
不足爲其情也春之盎盎不足爲其和也秋之明
潔不足爲其格也風檣陣馬不足爲其勇也瓦棺
篆鼎不足爲其古也時花美女不足爲其色也荒

國陵殿梗莽丘隴不足爲其恨怨悲愁也鯨吐鰲
擲牛鬼蛇神不足爲其虛荒幻誕也蓋騷之裔理
雖不及辭或過之騷有感怨刺懟言及君臣理亂
時有以激發人意而賀所爲無得有是賀能採尋
前事所以深歎恨今古未嘗經道者如金銅仙人
辭漢歌補梁庾肩吾宮體謠求取情狀離絕遠去
筆墨畦逕間亦殊不能知之賀生二十七年死矣
世皆曰使賀且未死少加以理奴僕命騷可也

柳宗元

雪詩云千山鳥飛絕萬徑人蹤滅孤舟蓑笠翁獨

釣寒江雪

視鄭谷亂飄僧舍之句
不作矣東坡居士云

子厚死三年愚溪無復曩時矣劉夢得聞之賦三
絕云溪水悠悠春自來草堂無主燕飛迴隔簾惟
見中庭草一樹山櫺依舊開草聖數行留壞壁木
奴千樹屬隣家惟見里門通德勝殘陽寂寞出樵
車柳門竹巷依依在野草青苔日日多縱有隣人

解吹笛山陽舊侶更誰過

邵真

尋人偶題云日昃不復午落花難歸樹人生能幾
何莫厭相逢遇

真為李寶臣成德軍掌書記寶臣死其子惟岳與
田悅李正已拒命真諫之惟岳寤使真作奏復為
將吏所沮德宗詔張孝忠朱滔合兵討惟岳大敗
其眾惟岳召真議歸順悅遣扈炭來責惟岳且欲

斬真惟岳懼斬真以謝焉其後王武俊表其忠贈
戶部尚書

李宣遠

宣遠貞元進士登第并州路作云秋日并州路黃
榆落照間孤城吹角罷數騎射鵬還帳幙遙臨水
牛羊自下山征人正垂淚烽火起雲間

王建

千牛仗下放朝初玉案傍邊立起居每日請來金

鳳紙殿頭無事不教書延英引對碧衣郎江硯

宣毫各別床天子下簾親考試宮人手裏過茶湯

少年天子愛邊功親到凌烟画閣中爲見勳臣

寫圖本長教殿裏作屏風新調白馬怕鞭聲供

奉騎來繞殿行爲報諸王侵早起隔門催進打毬

名羅衫葉葉繡重重金鳳銀鵝各一叢每遍舞

頭分兩向太平萬歲字當中魚藻宮中鎖翠娥

先皇行處不曾過如今池底休鋪錦菱角雞頭積

漸多 射生宮女宿紅妝請得新弓各自張臨上
馬時齊賜酒男兒跪拜謝君王 宮人早起笑相
呼不識堦前掃地夫乞與金錢爭借問外頭還似
此間無 日高殿裏有香烟萬歲聲來動九天妃
子院中初降誕內人爭乞洗兒錢 銀燭秋光冷
画屏輕羅小扇撲流螢天階夜色涼如水卧看牽
牛織女星 樹頭樹底覓殘紅一片西飛一片東
自是桃花貪結子錯教人恨五更風 淚盡羅巾

夢不成夜深前殿按歌聲紅顏未老恩先斷斜倚
熏籠坐到明 鴛鴦瓦上瞥然聲晝寢宮娥夢裏
驚元是吾皇金彈子海棠花下打流鶯
建初爲渭南尉值王樞密者盡宗人之分然彼我
不均復懷輕謗之色忽過飲樞密深憾其譏乃曰
吾弟所作宮詞天下皆誦於口禁掖深邃何以知
之建不能對後爲詩以贈之乃脫其禍建詩曰先
朝行坐鎮相隨今上春宮見長時脫下御衣偏得

着進來龍馬每教騎常承密旨還家少獨對邊情
出殿遲不是官家頻向說九重爭遣外人知

李灣

紀事作朱灣

高仲武云李灣率履貞素放情江湖郡國交辟潛
耀不起有唐高人也詩體幽遠與用洪深因詞寫
意窮理盡性於詠物尤工如受氣何曾異開花獨
自遲所謂哀而不傷國風之深者也

灣為李勉永平從事灣秋夜宴王郎中宅賦得露
中菊云眾芳春競發寒菊露偏滋受氣何曾異開
花獨自遲晚成猶有分欲採未過時忍棄東籬下
看隨秋草衰

長安喜雪云千門萬戶雪花浮點點無聲落瓦溝
全似玉塵消更積半成冰片結還流光含曉色清
天花輕逐微風遶御樓平地已霑盈尺潤年豐須
荷富民侯

蘇郁

鸚鵡詞云莫把金籠閉鸚鵡
個個分明解人語
忽然更向君前語
三十六宮愁幾許

和戎詩云關月夜懸青塚鏡
塞雲秋薄漢宮羅
君王莫信和親策
生得胡雛轉更多

郁貞元元和間詩人十二樓
藏玉堞中鳳凰雙宿
碧芙蓉流霞淺酌誰同醉
今夜笙歌第幾重

步虛詞

吟倚雨殘樹月收山下村

韋丹

丹字公明京兆人幼孤從外祖顏真卿元和中帥

江西功第一

丹與東林靈澈上人爲忘形之契丹嘗爲思歸絕句以寄澈云王事紛紛無暇日浮生冉冉只如雲已爲平子歸休計五老巖前必共聞澈奉酬詩曰年老身閒無外事麻衣草坐亦容身相逢盡道休官去林下何曾見一人

王播

王播少孤貧嘗客揚州惠照寺木蘭院隨僧齋餐
 僧厭怠乃齋罷而後擊鐘後二紀播自重位出鎮
 是邦因訪舊遊向之題者皆以碧紗幕其詩播繼
 以二絕句曰三十年前此院遊木蘭花發院新修
 如今再到經行處樹老無花僧白頭又上堂已了
 各西東慚愧闍黎飯後鐘三十年來塵撲面而今
 始得碧紗籠

出據
言

周匡物

匡物字幾本潭州人元和十一年李逢吉下進士
 及第時以歌詩著名家貧徒步應舉至錢塘乏僦
 船之資久不得濟乃題詩公館云萬里茫茫天塹
 遙秦皇底事不安橋錢塘江口無錢過又沮西陵
 兩信潮郡牧見之乃罪津吏

劉言史

皮日休劉棗強碑文云歌詩之風蕩來久矣大抵
 喪于南朝壞于陳叔寶然今之業是者苟不能求

古於建安卽江左矣苟不能求麗於江左卽南朝矣或過爲艷傷麗病者卽南朝之罪人也吾唐來有是業者言出天地外思出鬼神表讀之則神馳八極測之則心懷四溟磊磊落落真非世間語也自李太白百歲有是業者雕金篆玉牢奇籠怪百鍛爲字千鍊成句雖不追躅太白亦後來之佳作也其與李賀同時有劉棗強焉先生姓劉氏名言史不詳其鄉里有所歌詩千首其美麗恢贍白賀

外世莫得比王武俊之節制鎮冀也先生造之武俊雄健頗好詞藝一見先生遂加異敬將置之賓位先生辭免武俊善騎射載先生以貳乘逞其藝於野武俊先騎驚雙鴨起於蒲稗間武俊控弦不再發雙鴨聯斃於地武俊歡甚命先生曰某之伎如是先生之詞如是可謂文武之會矣何不一言以讚耶先生由是馬上草射鴨歌以示武俊議者以爲禰正平鸚鵡賦之類也武俊益重先生由是

奏請官先生詔授棗強令先生辭疾不就世重之
曰劉棗強亦如范萊蕪之類焉故相國隴西公夷
簡之節度漢南也少與先生遊且思相見命列將
以襄之髹器千事賂武俊以請先生武俊許之先
生由是爲漢南相府賓冠隴西公日與之爲飲宴
具獻酬之儀歌詩大播於當時爲隴西公從事或
曰以某下走之才誠不足污辱重地劉棗強至重
必以公賓劉於幕吏之上何抑之如是公曰愚非

惜幕間一足地不容劉也然視其狀有不足稱者
諸公視某與劉分豈有間哉然反爲之惜其壽耳
後不得已問先生所欲爲先生曰司功掾甚閒或
可承闕相國由是掾之雖居官曹宴見與從事儀
等後從事又曰劉棗強縱不容在賓署承乏於掾
曹誦矣奚不疏整其秩相國不得已而表奏焉詔
下之日先生不恙而卒相國哀之慟曰果然止掾
曹然吾愛客葬之有加等墳去襄陽郭五里曰柳

子關後先生數十歲日休始以鄙文稱於襄陽襄陽邑人劉求高士也嘗述先生之道業嘗詠先生之歌詩且歎曰襄之人只知有浩然墓不知有先生墓恐百歲之後湮滅而無聞與荆棘凡骨溷吾子之文吾當刊焉日休幸存既撫實錄之何愧嗚呼先生之官卑不稱其德宜加私謚然棗強之號世已美矣故不加焉是為劉棗強碑

劉猛

月生十五前日望光彩圓月滿十五後日畏光彩瘦不見夜光色一罇成暗酒匣中苔背鏡光短不照空不惜補明月慙無此良工月生句自念數年間兩手中藏鈎於心且無恨他日為我羞古老傳童歌連淫亦兵象夜夢戈甲鳴苦不願年長苦雨句朝梳一把白夜淚千滴雨可耻垂拱時老作在家女晚句元微之酬劉猛見送詩如云神劍土不蝕異布火

不燒其推重如此

李餘

長安東門別立馬生白髮句霽後軒蓋繁南山瑞

烟發句嘗聞車馬繁土薄憂水聲句

餘登長慶二年進士第蜀人也張籍送餘歸蜀詩

云十年人詠好詩章今日成名出舉場歸去唯將

新話牒後來爭取舊衣裳山橋曉上蕉花暗水店

晴看芋葉光鄉里親情相見日一時携酒上高堂

又賈島送餘往湖南云昔去候温涼秋山滿蜀鄉

今來從辟命春物變涪陽岳石挂海雪野楓堆渚

檣若尋吾祖宅寂寞在瀟湘

李涉

題鶴林寺僧室云終日昏昏醉夢間忽聞春盡強

登山因過竹院逢僧話又得浮生半日閒

晚泊潤州聞角云孤城吹角水茫茫曲引邊聲怨

思長驚起暮天沙上雁海門斜去兩三行

但將鐘鼓悅私慶肯以犬羊為國羞句尼父未適
魯僂僂倦迷津徒懷教化心紆鬱不能伸一遇知
已言萬方始喧喧至今百王則孰不挹其源句

劉昭禹

昭禹字休明婺州人也少師林寬為詩刻苦風雪
詩云句向夜深得心從天外歸

嘗與人論詩曰五言如四十個賢人著一字如屠
沽不得覓句者若掘得玉合子底必有蓋但精心
求之必獲其實在湖南累為宰後署天策府學士
嚴州刺史卒于桂州幕中有詩三百首

孫昌胤

和司空曙劉慎虛九日送人云京邑歎離羣江樓
喜遇君開筵當九日泛菊外浮雲朗詠山川霽酣
歌物色曛君看酒中意未肯喪斯文

柳子厚與韋中立書云古者重冠禮將以責成人
之道是聖人所尤用心者也數百年來人不復行

近有孫昌胤者獨發憤行之既成禮明日造朝到外廷薦笏言於卿士某子冠畢應之者咸憮然京兆尹鄭叔則怫然曳笏却立曰何預我耶廷中皆大笑天下不以非鄭尹而怪孫子何哉獨爲所不爲也

昌胤登天寶進士第

嚴休復

揚州唐昌觀玉蘂花拆有仙人遊悵然成一絕云

終日齋心禱玉宸
魂銷目斷未逢真
不如滿樹瓊瑤蘂
笑對藏花洞裏人
又羽車潛下玉龜山
塵世何由覩舜顏
惟有無情枝上雪
好風吹綴綠雲鬟
元和中見一女子
從以二女冠三小僕
直造花所佇立良久
命小童折花數枝
謂黃冠者曰曩有玉
峰之期自是可以行
矣行百步許遂不復
見休復有詩元微之
和云弄玉潛歸玉樹
時不教青鳥出花
枝的應未有諸人
覺只恐嚴郎卜得知

樂天詩云羸女輸乘鳳下時洞中潛歇弄花枝不
緣啼鳥春饒舌青瑣僊郎可得知

朱慶餘

慶餘遇水部郎中張籍知音索慶餘新舊篇擇留
二十六章置之懷袖而推贊之時人以籍重名皆
繕錄諷詠遂登科慶餘作閨意一篇以獻曰洞房
昨夜停紅燭待曉堂前拜舅姑粧罷低聲問夫婿
画眉深淺入時無籍酬之曰越女新粧出鏡心自
知明豔更沉吟齊紈未足時人貴一曲菱歌敵萬
金由是朱之詩名流於海內矣

又題王侯廢宅云古巷戟門誰舊宅早曾聞說屬
官家更無新燕來巢屋唯有閒人去看花空廡欲
摧塵滿櫪小池初涸草侵沙繁華事歇皆如此立
馬踟躕到日斜

張籍送慶餘歸越云東隣歸路遠幾日到鄉中有
寺山皆遍無家水不通湖聲蓮葉雨野氣稻苗風

州縣知名久爭邀與客同

楊虞卿

過小妓英英墓云凌晨騎馬出皇都聞說埋花在
路隅別我已為泉下土思君猶似掌中珠四絃品
柱聲初絕三尺孤墳草已枯蘭質蕙心何所在焉
知過者是狂夫樂天夢得皆有和章

樂天云人間有夢何曾入泉下無家豈是歸墳上
少啼留取淚明年寒食更霑衣

夢得云但見好花皆易落從來尤物不長生鸞臺
夜直衣衾冷雲雨無因入禁城

虞卿字師臯虢州人佞柔善諧麗宗閔僧孺相穆
宗引為右司郎中宗閔倚之時號黨魁為京兆尹
以罪貶虔州司戶叅軍死

楊汝士

唐名族重京官而輕外任汝士建節後詩云拋却
弓刀上砌臺上方樓殿窳雲開山僧見我衣裳窄

知道新從戰地來又云而今老大騎官馬羞向關
 西道姓楊寶歷中楊於陵僕射入覲其子嗣復率
 兩榜門生迎於潼關宴新昌里第僕射與所執坐
 正寢嗣復領諸生翼兩序元白俱在賦詩席上汝
 士詩後成元白覽之失色詩曰隔座應須賜御屏
 盡將仙翰入高冥文章舊價留鸞掖桃李新陰在
 鯉庭再歲生徒陳賀宴一時良史盡傳馨當時疏
 廣雖云盛詎有茲筵醉醪醺其日大醉歸謂其子

弟曰吾今日壓倒元白

時為刑侍

裴令公居守東洛夜宴半酣公索句元白有德色
 時公為破題次至汝士曰昔日蘭亭無豔質此時
 金谷有高人白知不能加遽裂之曰笙歌鼎沸勿
 作冷淡生活元顧曰樂天所謂能全其名者也

張志和

漁父歌云西塞山前白鷺飛桃花流水鱖魚肥青
 箬笠綠簑衣斜風細雨不須歸又云釣臺漁父褐

為裘兩雨三三舴艋舟能縱棹慣乘流長江白浪
 不曾憂又云雪溪灣裏釣魚翁舴艋為家西復東
 江上雪浦邊風笑着荷衣不歎窮又云松江蟹舍
 主人歡菰飯尊羹亦共餐楓葉落荻花乾醉宿漁
 舟不覺寒又云青草湖中月正圓巴陵漁父棹歌
 連釣車子掘頭船樂在風波不用仙

嚴維

維字正文越州人與劉長卿善長卿對酒寄維云

陋巷喜陽和衰顏對酒歌懶從華髮亂閒住白雲
 多郡簡容垂釣家貧學弄梭門前七里瀨早晚子
 陵過維答云蘇耽佐郡時近出白雲司藥補清羸
 疾窓吟絕妙詞柳塘春水慢花塢夕陽遲欲識懷

君意朝朝訪檝師

時劉為睦州司馬

李播

播以郎中典蘄州有李生攜詩謁之播曰此吾未
 第時行卷也李曰頃於京師書肆百錢得此游江

淮間二十餘年欲幸見惠播遂與之因問何往曰
江陵謁盧尚書播曰公又錯也盧是某親表李慚
悚失次進曰誠若郎中之言與荆南表文一時乞
取再拜而出

李德裕

元和十一年歲在丙申李逢吉下三十三人皆取
寒素時有詩曰元和天子丙申年三十三人同得
仙袍似爛銀文似錦相將白日上青天德裕頗為

寒素開路及謫官南去或有詩曰八百孤寒齊下

淚一時回首望崖州

出撫
言

鄭還古

還古閒居東都將入京赴選柳當將軍者餞之酒
酣以一詩贈柳氏之妓曰冶豔出神仙清聲勝管
絃詞輕白紵曲歌過碧雲天未擬生裴秀何如乞
鄭玄不堪金谷水橫過墜樓前柳喜甚曰專俟榮
命以此為賀未幾還古除國子博士柳見除目即

遣入京及嘉祥驛而還古物故乃放妓他適逸史
載還古初娶柳氏女嘉會之初夢娶房氏後柳卒
再娶東都李氏屬房直温爲東洛少尹李之舅也
禮宴皆房主之始知舊夢之前定也

還古登元和進士第

裴休

贈黃蘗山僧希運詩曰自從大士傳心印額上圓
珠七尺身挂錫十年棲蜀水浮杯今日渡江濱一

千龍象隨高步萬里香華結勝因擬欲事師爲弟
子不知將法付何人休會昌中官于鐘陵請運至
郡以所解一篇示之師不顧曰若形於紙墨何有
吾宗休問其故曰上乘之印唯是一心更無別法
心體一空萬緣俱寂如大日輪升於虛空其中照
耀靜無纖埃證之者無新舊無淺深說之者不立
義解不開戶牖直下便是動念卽垂其後休錄之
爲傳心法要云

休字公美孟州人大中六年爲相能文章爲人醞籍進止雍閒宣宗曰休真儒者

薛宜僚

宜僚以左庶子充新羅冊贈使至青州悅一妓段東美賦詩曰阿母桃花方似錦王孫草色正如烟不須更向滄溟望惆悵歡情又一年到外國謂判官苗甲曰東美何故頻見夢中數日而卒觀至青段奠之一慟而卒

九老會胡杲

九老會賦詩云閒居同會在三春大抵愚年最出羣霜鬢不嫌杯酒興白頭仍愛玉爐薰徘徊玩柳心猶健老大看花意却勤鑿落滿斟判酪酏香囊高挂任氤氳搜神得句題紅紙望景長吟對白雲

今日交情何不替齊年同事聖明君

杲年八十九
懷州司馬

吉皎

休官罷任已閑居林苑園亭興有餘對酒最宜花

藻發邀歡不厭柳條初低腰醉舞垂緋袖擊筋謳
 歌任褐裾寧用管絃來合雜自親松竹且清虛飛
 觥酒到須先酌賦詠詩成不住書借問商山賢四
 皓不知此後更何如

皎衛尉卿致仕年八十八

劉真

垂絲今日幸同筵朱紫居身是大年賞景尚知心
 未退吟詩猶覺力完全間庭飲酒當三月在席揮
 毫象七賢山茗煮時秋霧碧玉杯斟處綵霞鮮臨

堦花笑如歌妓傍竹松聲當管絃雖未學窮生死
 訣人閒豈不是神仙

真前磁州刺史年八十七

鄭據

東洛幽閒日暮春邀歡多是白頭賓官班朱紫多
 相似年紀高低次第勻聯句每言松竹意停杯多
 說古今人更無外事來心肺空有清虛入思神醉
 舞兩迴迎勸酒狂歌一曲會間身今朝何事偏情
 重同作明時列任臣

據前龍武軍長史年八十五

盧貞

三春已盡洛陽宮天氣初晴景象中千朵嫩桃迎
曉日萬株垂柳逐和風非論官位皆相似及至年
高亦共同對酒歌聲猶覺妙玩花詩思豈能窮先
時共作三朝貴今日猶逢七老翁但願醪醕常滿

酌烟霞萬里會應通

貞前侍御史內供奉官年八十三

張渾

幽亭春盡共為歡印綬居身是大官道跡豈勞登

遠岫垂絲何必坐溪磻詩聯六韻猶應易酒飲三
杯未覺難每況襟懷同宴會共將心事比波瀾風
吹野柳懸羅帶日照庭花落綺紈此席不須鋪錦

帳斯筵堪作画图看

渾前永州刺史年七十七

白居易

七人五百八十四拖紫紆朱垂白鬚囊裏無金莫
嗟歎樽中有酒且歡娛吟成六韻神還壯飲到三
杯氣尚麓嵬我狂歌教婢拍婆娑醉舞遣孫扶天

年高邁二疎傳人數多於四皓圖除却三山五天

竺人間此會且應無

居易刑部尚書致仕年七十四

樂天退居洛中作尚齒九老之會其序曰胡吉劉

鄭盧張等六賢皆多年壽余亦次焉於東都弊居

履道坊為尚齒之會七老相顧既醉且歡靜而思

之此會希有因各賦七言六韻詩一章以記之或

傳諸好事者時會昌五年三月二十四日樂天云

其年夏又有二老年貌絕倫同歸故鄉亦來斯會

續命書姓名年齒寫其形貌附于圖右與前七老

題為九老圖仍以一絕贈之云雪作鬚眉雲作衣

遼東華表暮雙歸當時一鶴猶希有何況今逢兩

令威

洛中遺老李元爽年一百三十六禪僧如滿年九十五歲

又云時祕書狄

兼謨河南尹盧貞以年未及七十雖與會而不及

列

貫以

全唐詩話卷之三 終

全唐詩話卷之四

項斯

斯字子遷江東人始未為聞人因以卷謁楊敬之
楊苦愛之贈詩云幾度見詩詩盡好及觀標格過
於詩平生不解藏人善到處逢人說項斯未幾詩
達長安明年擢上第

蒼梧雲氣詩云何年畫作愁漠漠便難收數點山
能遠平鋪水不流溼連湘竹暮濃蓋舜墳秋亦有

全唐詩話 卷四
一
憑鄉客看來盡白頭

滕邁

湖州崔芻言郎中初爲越副戎宴席中有周德華者劉採春女善歌楊柳枝詞所唱七八篇皆名流之詠滕邁郎中一首云三條陌上拂金羈萬里橋邊映酒旗此日令人腸欲斷不堪將入笛中吹雲溪子曰杜牧舍人云巫娥廟裏低含雨宋玉堂前斜帶風滕郎中又云陶令門前罨接羅亞夫營

裏拂旌旗但不言楊柳二字最爲妙也是以姚合郎中吟道傍亭子詩云南陌遊人迴首去東林過者杖藜歸不稱亭而意見矣

邁登元和進士第

裴思謙

思謙及第後作紅牋名紙十數詣平康里因宿於里中詰旦賦詩曰銀缸斜背解鳴璫小語偷聲賀玉郎從此不知蘭麝貴夜來新染桂枝香

全唐詩話 卷四
思謙開成三年登進士第

廖有方

有方元和十年失意遊蜀至寶雞西界窆旅逝者
書版記之曰余元和乙未歲落第西征適此聞呻
吟之聲潛聽而微憒也問其疾苦住止對曰辛勤
數舉未遇知音盼睐叩頭久而復語唯以殘骸相
託餘不能言俄而逝余乃驚所乘馬於村豪備棺
瘞之恨不知其姓字臨岐淒斷復爲詩曰嗟君沒

世委空囊幾度勞心翰墨場半面爲君申一慟不
知何處是家鄉明年李逢吉擢有方及第唐之義
士也交州人柳子厚以序送之

姚合

張籍寄合詩云病來辭赤縣案上有丹經爲客燒
茶竈教兒掃竹亭詩成添舊卷酒盡臥空餅闕下
今遺逸誰占隱士星

武功縣閒居云縣去京城遠爲官與隱齊馬隨山

鹿放雞雜野禽棲連舍惟藤架侵堦是藥畦更師
嵇叔夜不擬作書題

又云簿書多不會薄俸亦難消醉卧慵開眼閒行
懶繫腰移花兼蝶至買石得雲饒且自心中樂從
他笑寂寥

方干哭姚監云入室幾人成弟子爲儒是處哭先
生

宋雍

范攄云宋雍初無令譽及嬰瞽疾其詩名始彰盧
員外綸作擬僧之詩僧清江作七夕之詠劉隨州
有眼作無眼之句宋雍無眼作有眼之詩詩流以
爲四背或云四倒然辭意悉爲佳致盧公詩云願
得遠公知姓字焚香洗鉢過餘生清江詩曰唯愁
更漏促離別在明朝劉隨州曰細雨溼衣看不見
閒花落地聽無聲雍詩曰黃鳥不堪愁裏聽綠楊
宜向雨中看

段文昌

文昌父鏐爲江陵糾文昌自渚宮客遊成都韋南
康與秦釋褐爲賓從後劉闢逐佐外邑高崇文收
蜀召復舊職指其椅曰此猶不足與君坐文昌遽
請歸闕至興元西鵠鳴驛有僧倚巴山者有前識
謂文昌曰去日旣逢梅蘂綻來時應見杏花開至
京屢升擢自相位拜劔南節度西至鵠鳴僧已物
故杏花方盛

文昌鎮蜀有題武儋寺西臺詩云秋天如鏡空樓
閣盡玲瓏水暗餘霞外山明落照中鳥行看漸遠
松韻聽難窮今日登臨意多歡語笑同

劉郇伯

郇伯與范鄴郎中爲詩友范曾得一句云歲盡天
涯雨久而莫屬郇伯曰何不曰人生分外愁范甚
賞之

出北夢
瑣言

陳彥博

恩賜魏文正公諸孫舊第以導直臣云阿衡隨逝
水池館主他人天意能疇德雲孫喜庇身生前由
直道歿後振芳塵雨露新恩日芝蘭故里春勳庸
流十代光彩映諸隣共喜升平際從茲得諫臣
白居易爲翰林學士奏云今日奏宣令撰李師道
請收贖魏徵宅還其子孫甚合朕心允依來奏臣
伏以魏徵太宗宰相盡心輔佐以致太平在其子
孫宜加優卹事關激勸合出朝廷師道何人輒掠
此美伏願明勅有司特以官錢收贖使還後嗣以
勸忠臣則事出皇恩美歸聖德憲宗深然之其後
有司以爲詩題試進士

郭良驥

自蘇州至望亭驛有作云南浦菰蒲遶白蘋東吳
黎庶逐黃巾野棠自發空流水江燕初歸不見人
遠岫依依如送客平田渺渺獨傷春淮中回首長
洲苑烽火年年報虜塵觀詩所載疑李錡叛時事

也

崔嘏

沈肩吾與之同年不睦嘏舊失一目以珠代之施
嘲之曰二十九年及第五十七眼看花元和十五
年也

唐球

球有詩名如臨池洗硯云恰似有龍深處卧被人
驚起黑雲生又有漸寒沙上路欲暖水邊村亦佳

句也球居蜀之味江山方外之士也為詩撚藁為
圓納之大瓢中後卧病投瓢於江曰斯文苟不沉
沒得者方知吾苦心爾至新渠有識者曰唐山人
瓢也接得之十纔二三其題鄭處士隱居云不信
最清曠及來愁已空數點水泉雨一溪霜葉風業
在在山處道成無事中酌盡一樽酒老夫顏亦紅
贈行如上人云不知名利苦念佛老岷峨衲補雲
千片香焚篆一窠戀山人事少憐客道心多日日

金月詩言 七
齊鐘罷高懸瀘水羅題青城觀云數里緣山不厭
難爲尋真訣問黃冠苔鋪點翠山橋滑松織香梢
古道寒晝傍綠畦嬋嫩玉夜開紅竈燃新丹孤鐘
已斷泉聲在風動瑤花月滿壇

白敏中

敏中詩云一詔皇城四海頌醜戎無數束身還戍
樓吹笛人休戰牧野嘶風馬自閑河水九盤收數
曲天山千里鎖諸關西邊北塞今無事爲報東南

夷與蠻魏扶詩云蕭關新復舊山川古戍秦原景
象鮮戎虜乞降歸惠化皇威漸被懾腥羶穹廬遠
戍烟塵滅神武光揚竹帛傳左衽盡知訶帝澤從
茲不更備三邊崔鉉詩云邊壘萬里注恩波宇宙
羣方洽凱歌右地名王爭解辯遠方戎壘盡投戈
烟塵永息三秋戍瑞氣遙清九折河共遇聖明千
載運更觀俗阜與時和王起長慶中再主文柄意
欲以第一人處敏中恨其與賀拔碁爲友碁有文

而落魄因密令親知述意俾與基絕敏中欣然曰
如斯教旣而基造門左右給以敏中他適基遲留
不言而去俄頃敏中躍出見基於是悉以實告乃
曰一第何門不致奈輕負至交相與歡醉或語於
起起曰我比只得敏中今當更取基矣遂以第一
人處基而敏中居三焉

魏扶

扶登大和四年進士第大中初知禮闈入貢院題

詩云梧桐葉落滿庭陰鎖閉朱門試院深曾是當
年辛苦地不將今日負初心榜出無名子削爲五
言詩以譏之

馬植

同華解最利元和中令孤楚鎮三峰時及秋賦榜
云特加試五場莫有至者唯盧洪正請試已試兩
場而植不解植將家子從事竊笑曰此未可知已
而試登山採玉賦略曰文豹且異於驪龍採斯疎

矣白石又殊於玳蚌剖莫得之公大服其精遂奪
解元後洪正自丞郎將判齏俄爲植所據復以手
札戲植曰昔日華元已遭毒手今來齏務又中老
拳植罷安南都護及除黔南殊不得意維舟峽中
古寺寺前有長堤夜月明甚見白衣緩步堤上吟
曰截竹爲筒作笛吹鳳凰池上鳳凰飛勞君更向
黔南去卽是陶鎔萬類時邀問則失之矣後自黔
南召入爲大理遷刑部判監鐵拜相

植字存之爲李德裕所抑頗怨望宣宗立白敏中
當國凡德裕所不善悉不次用之故植遂相

崔鉉

魏公鉉元略之子也爲兒時隨父訪韓宣公滉滉
指架上鷹令詠焉吟曰天邊心膽架頭身欲擬飛
騰未有因萬里碧霄終一去不知誰是解縑人滉
曰此兒可謂前程萬里也寶曆三年登第久居廊
廟三擁節麾宣宗嘗謂侍臣曰崔鉉真貴人裴休

全唐詩話 卷四
真措大初李石鎮江陵辟爲戎倅一旦告去旣入
京華俄升翰苑造朝凡三歲石未離荆渚崔旣秉
鈞衡石馳牋賀之曰鉉早拜光塵叩承眷與深蒙
異分屢接清言幸曾辱於厚恩俯見循於末契去
載分麾南楚拜節西秦思賢方詠於嘉魚棲止實
慙於威鳳賓筵初啓曾陪樽俎之歡將幕永移已
在陶鎔之下光生隣部喜溢轅門豈惟九土獲安
斯亦一方多幸乃掌記李騭之詞也

鉉字台碩相武宗與李德裕不叶罷復相宣宗除
揚州大都督府長史封魏國公宣宗於太液亭上
賦詩宴餞有七載秉鈞調四序之句識者莫不榮
之

裴夷直

夷直字禮卿文宗時爲右拾遺張克勤以五品官
推與其甥夷直時爲禮部員外郎劾曰是開後日
賣爵之端詔聽遂著於令爲中書舍人武宗立視

冊牒不肯書出刺杭州斥驩州司戶叅軍宣宗初
復拜江華等州刺史終散騎常侍夷直戲唐仁烈
詩云自知年紀偏應少先把屠蘇不讓春儻更數
年逢此日還應惆悵羨他人

楊敬之

敬之字茂孝文宗命為祭酒兼太常少卿是日二
子戎載登科時號楊家三喜敬之華山賦最為韓
愈李德裕所稱士林一時傳布

霜樹鳥棲夜空街雀報明句碧山相倚暮歸雁一

行斜句

俞鳧

鳧毗陵人開成進士也卒於烏程令

顏凋明鏡覺思苦白雲知句滄洲迷釣隱紫閣負

僧期句酬難塵鬢皓坐久壁燈青句滄洲未歸迹

華髮受恩心

楊衡

初隱廬山有盜其文登第者衡因詣闕亦登第見其人盛怒曰一一鶴聲飛上天在否荅曰此句知兄最惜不敢偷衡笑曰猶可恕也

隨雲步入青牛谷青牛道士留我宿可憐夜久月

明中惟有壇邊一枝竹

宿青牛谷

都無看花意○偶到樹邊來○可憐枝上色○一一為愁

開題花樹

○哭李象云白鷄黃犬不將去○寂寞空餘葬時路○草

死○花○開○更○幾○年○後○人○知○是○何○人○墓○憶○君○思○君○獨○不○眠○夜○寒○月○照○青○楓○樹

王彥威

長安舊俗以不歷臺省出領廉車節鎮者率呼為
龕官大率重內而輕外今東京皇城乾元門舊宣
武軍鼓角樓也節度使王彥威有詩刻石在其上
曰天兵十萬勇如貔正是酬恩報國時汴水波瀾
喧鼓角隋堤楊柳拂旌旗前驅紅旆關西將坐間

青娥趙國姬寄與長安舊冠蓋麗官到底是男兒
彥威自太常博士出辟使府至茲鎮故有是句後
梁氏建國其石不知所往薛能亦有謝寄茶詩云
麗官寄與真拋却賴有詩情合得嘗洪文館舊不
置學士文宗特置一員以待彥威爲戶部侍郎邊
兵訴所賜不時縑皆敝惡貶衛尉卿俄爲忠武節
度徙宣武卒

繁知一

樂天除蘇州刺史自峽沿流赴郡時秭歸縣繁知
一聞居易將過巫山先於神女祠粉壁大書之曰
忠州刺史今才子行到巫山必有詩爲報高唐神
女道速排雲雨候清詞居易觀之悵然邀知一至
曰歷陽劉郎中禹錫三年理白帝欲作一詩而不
能罷郡經過悉去千餘詩但留四詩而已沈佺期
詩曰巫山高不極合杳奇狀新闡谷疑風雨幽崖
若鬼神月明三峽曙潮滿九江春爲問陽臺客應

如入夢人王無競詩曰神女向高堂巫山下夕陽
徘徊作行雨婉變夢荆王電影江前落雷聲峽外
長朝雲無處所臺館曉蒼蒼皇甫冉詩曰巫峽見
巴東迢迢出半空雲藏神女館雨到楚王宮朝暮
泉聲落寒暄樹色同清猿不可聽偏在九秋中李
端詩曰巫山十二重皆在碧空中迴合雲藏日霏
微雨帶風猿聲寒度水樹色暮連空悲向高唐去
千秋見楚宮居易吟四篇與繁生同濟卒不賦詩

雍裕之

野酌亂無巡送君兼送春明年春色至莫作未歸
人春晦送客裕之正元後詩人也

張祐

題金山寺云一宿金山頂微茫水國分僧歸夜船
月龍出曉堂雲樹影中流見鐘聲兩岸聞因悲在
朝市終日醉醺醺

入潼關云都城三百里雄險此迴環地勢遙尊嶽

河流側讓關秦皇曾虎視漢祖昔龍顏何處梟兇
輩干戈自不閒

故國三千里深宮二十年一聲河滿子雙淚落君
前自倚能歌曲先皇掌上憐新聲何處唱腸斷李
延年二章祐所作宮詞也傳入宮禁武宗疾薦目
孟才人曰吾卽不諱爾何爲哉才人指笙囊泣曰
請以此就縊上惻然復曰妾嘗藝歌請對上歌一
曲以泄其憤上許乃歌一聲河滿子氣亟立殞上

令醫候之曰脉尚溫而腸已絕帝崩柩重不可舉
或曰非俟才人乎爰命其櫬櫬至乃舉祐爲孟才
人歎序曰才人以誠死上以誠命雖古之義激無
以過也歌曰偶因歌態詠嬌頰傳唱宮中十二春
却爲一聲河滿子下泉須弔舊才人

寧哥來云日映宮城霧半開太真簾下畏人猜黃
翻綽指向西樹不信寧哥回馬來

感王將軍柘枝妓歿云寂寞春風舊柘枝舞人休

唱曲休吹鴛鴦鈿帶拋何處孔雀羅衫付阿誰画
鼓不聞招節拍錦靴空想挫腰肢今來坐上偏惆
悵曾是堂前教徹時

祐長慶中深爲令狐楚所知楚鎮天平自草薦表
令以詩三百篇隨狀表進祐至京屬元稹在內庭
上問之稹曰祐雕虫小巧壯夫不爲或獎激之恐
變陛下風教上頷之由是失意東歸有孟浩然身
更不疑之句

李商隱

楊大年云義山詩陳恕酷愛一絕云珠箔輕明覆
玉墀披香新殿鬪腰肢不須看盡魚龍戲終遣君
王怒偃師歎曰古人措辭寓意如此深妙令人感
慨不已大年又曰鄧帥錢若水舉賈誼兩句云可
憐半夜虛前席不問蒼生問鬼神錢云措意如此
後人何以企及鹿門先生唐彥謙爲詩纂慕玉溪
得其清峭感愴蓋其一體也然警絕之句亦多有

義山少遊投宿逆旅主人會客召與坐不知其爲
義山也酒酣席客賦木蘭花詩義山後就曰洞庭
波冷曉侵雲日日征帆送遠人幾度木蘭舟上望
不知元是此花身坐客覽之大驚詢之乃義山也

劉得仁

題邵公禪院云無事門多掩陰堦竹掃苔勁風吹
雪聚渴鳥啄冰開樹向寒山得人從瀑布來終朝
天目老携錫逐雲回

悲老宮人云白髮宮娃不解悲滿頭猶自插花枝
曾緣玉貌君王愛準擬人看似舊時

得仁貴主之子自開成至大中三朝昆弟皆歷貴
仕而得仁苦於詩出入舉場三十年卒無成常自
述曰外家雖是帝當路且無親又云外族帝王是
中朝親故稀翻令浮議者不許九霄飛旣終詩人
競爲詩弔之

吟苦曉燈暗露深秋草疎舊山多夢到流水送愁

餘句 風定一池星

宿宣義里池亭云暮色遶桐亭南山幽竹青夜深
斜舫月風定一池星島嶼無人跡菰蒲有鶴翎此
中休便得何必泛滄溟

長信宮云簾涼秋氣初長信恨何如拂黛月生指
解鬟雲滿梳一從悲画扇幾度泣前魚坐聽南宮
樂清風搖翠裾

王智興

智興爲徐州節度一日從事於使院會飲賦詩智
興召護軍俱至從事屏去翰墨智興曰適聞作詩
何獨見智興而罷復以牋陳席上小吏亦置牋於
智興前於是引毫立成曰三十年前老健兒剛被
郎官遣作詩江南花柳從君詠塞北煙塵獨我知
四座驚嗟監軍謂張祐曰觀茲盛事豈得無言祐
乃獻詩曰十年受命鎮方隅孝節忠規兩有餘誰
信將壇嘉政外李陵章句右軍書左右曰書生諂

辭耳智與叱曰有人道我惡汝輩又肯否張生海
內名士篇什豈易得天下人聞且以為王智興樂
善矣

馬戴

送客南遊云擬卜何山隱高秋指岳陽葦乾雲夢
色橘熟洞庭香踈雨殘虹影回雲背雁行靈均如
可問一為哭清湘

許棠久困名場咸通末戴佐大同軍幕棠往謁之
一見如舊相識畱連數月但詩酒而已未嘗問所
欲一旦大會賓友命使者以棠家書授之棠驚愕
莫知其來啓緘即知戴潛遣一介恤其家矣戴與
姚合善合有詩云天府鹿鳴客幽山秋未歸我知
方甚善眾說以為非隔石聞泉細和風見鶴飛新
詩此處得清峭比應稀又有送戴下第客遊詩云
昨夜送君處亦是九衢中此日殷勤別前時寂寞
同鳥啼寒食雨花落暮春風向晚離人別筵收樽

未空戴酬姚合中字韻詩云岐路非人見尚得起
心中日憶瀟湘渚春生蘭桂叢鳥啼花半落客散
爵方空所贈誠難答冷然一榻風

鄭顥

顥宰相細之孫登甲科以起居郎尚主有器識宣
宗時恩寵無比夢中嘗得句云石門霧露白玉殿
莓苔青續成長韻此一聯杜甫集中詩也大中十
年顥放牘後謁假觀省於洛生徒餞長樂驛俄有

紀於屋壁云三十驂騮一哄塵來時不鎖杏花春
楊花滿地如飛雪應有偷遊曲水人舊史云顥細
之子尚宣宗女萬壽公主因壽昌節上壽回夢一
宮殿與十數人納涼聯句既悟省石門之句十字
怪其不詳不數日宣宗弓劍上仙方悟其事乃續
爲十韻云間歲流虹節歸軒出禁扃奔波流長景
蕭灑夢殊庭境象非曾到崇巖昔未經日斜烏斂
翼風動鶴疎翎異苑人爭集涼臺筆不停石門霧

露白玉殿莓苔青若匪災先兆何緣思入冥御爐
虛仗馬華蓋負云亭白日成千古金滕闕九齡小

臣衰絕筆湖上泣青萍

御爐或作丹墀

未幾顛亦卒

李羣玉

羣玉好吹笙善急就章喜食鵝及授校書郎東歸
盧肇送詩云妙吹應諧鳳工書定得鵝杜丞相悰
筵中贈美人云裙拖六幅瀟湘水鬢聳巫山十朶
雲貌態祇應天上有歌聲豈合世間聞胸前瑞雪

燈斜照眼底桃花酒半醺不是相如憐賦客肯教
容易見文君羣玉解天祿之任而歸涪陽經二妃
廟題云小孤洲北浦雲邊二女明粧玉儼然野廟
向江春寂寂古碑無字草芊芊風迴日莫吹芳芷
月落山深哭杜鵑猶似含嚔望巡狩九疑凝黛隔
湘川又曰黃陵廟前春已空子規啼血滴松風不
知精爽落何處疑是行雲秋色中羣玉疑春空遂
至秋色欲易之恍若有物告以二年之兆時潯陽

太守段成式志其事二年後果死於洪井段以詩哭之曰曾話黃陵事今爲白日催老無男女累誰哭到泉臺

羣玉字文山澧州人裴休觀察湖南厚延致之及爲相以詩論薦授校書郎

溫庭筠

庭筠才思豔麗工於小賦每入試押官韻作賦凡八义手而八韻成時號温八义多爲鄰鋪假手日

救數人而士行玷缺縉紳薄之李義山謂曰近得一聯句云遠比趙公三十六年宰輔未得偶句温曰何不云近同郭令二十四考中書宣宗嘗賦詩上句有金步搖未能對遣求進士對之庭筠乃以玉縑脫續也宣宗賞焉又藥名有白頭翁温以蒼耳子爲對他皆類此宣皇愛唱菩薩蠻詞丞相令狐絢假其修撰密進之戒令勿泄而遽言於人由是疎之温亦有言云中書堂內坐將軍譏相國無

學也宣皇好微行遇於逆旅温不識龍顏傲然而詰之曰公非長史司馬之流帝曰非也又曰得非六叅簿尉之類帝曰非也謫爲方城尉其制詞曰孔門以德行為先文章爲末耳旣德行無取文章何以稱焉徒負不羈之才罕有適時之用竟流落而死杜棕自西川除淮海處筠詣尋曲杜氏林亭留詩云卓氏壚前金線柳隋家堤畔錦帆風貪爲兩地行霖雨不見池蓮照水紅邠公聞之遺絹千

疋曾於江淮爲親表辱之由是改名

王起

和周侍郎見寄云貢院離來二十霜誰知更忝主文場楊葉縱能穿舊的桂枝何必愛新香九重每憶同僊禁六義初吟得夜光莫道相知不相見嵩峰之下欲徵黃

起字舉之元和末爲中書舍人穆宗時錢徽坐貢舉失實貶詔起復核起建言以所試送宰相閱可

否然後付有司議者謂起失職李訓爲相起門生也引與共政文宗尚文好古學時鄭覃以經述進起以該博顯武宗時自東都召爲尚書判太常卿帝患選士不得才特命起典貢舉凡四舉士皆知名者人服其鑒慈恩寺題名云進士題名自神龍之後過闕宴後率皆期集於慈恩塔下題名故貞元中劉太真侍郎試慈恩寺望杏園花發詩會昌三年贊皇公爲上相其年十一月十九日勅諫議

大夫陳商守本官權知貢舉後因奏對不稱旨十二月十七日宰臣遂奏依前命左僕射兼太常卿王起主文二十二日中書覆奏奉宣旨不欲令及第進士呼有司爲座主趨附其門兼題名局席等條疏進來者伏以國家設文學之科求真正之士所宜行崇風俗義本君親然後升於朝廷必爲國器豈可懷賞拔之私惠忘教化之根源自謂門生遂成膠固所以時風寢壞臣節何施樹黨背公靡

不由此臣等商量今日已後進士及第任一度叅見有司向後不得聚集叅謁有司宅置宴其曲江大會朝官及題名局席並望勒停緣初獲美名實皆少雋既遇春節難阻良遊三五人自爲宴樂並無所禁唯不得聚集同年進士廣爲宴會仍委御史臺察訪聞奏謹具如前奉敕宜依於是向之題名各盡削去蓋贊皇公不由科第故設法以排之洎公失意悉復舊態

丁稜

公心獨立副天心三轄春闈冠古今蘭署門生皆入室蓮峰太守別知音同時人皆有繼和希逸字大隱希逸詩蟾蜍醉裏破蛺蝶夢中殘牛相在揚州嘗稱之

黃頗

頗爲失第後久方第據言曰黃頗以洪奧文章蹉跎者一十三載劉纂以平漫子弟而折丹桂由斯

言之可謂命能通性豈曰性能通命者韓愈自潮州量移宜春郡頗學愈爲文亦振大名頗嘗觀盧肇爲碑版則唾之而去頗宜春人與肇同鄉頗富而肇貧同日遵路赴舉郡牧餞頗離亭肇駐蹇十里以俟明年肇以第一名還袁因競渡卽席賦詩云向道是龍剛不信果然奪得錦標歸頗字無頗

鄭畋

馬嵬太真縊所題詩者多悽感鄭畋爲鳳翔從事

日題云玄宗回馬楊妃死雲雨雖亡日月新終是聖朝天子事景陽宮井又何人觀者以爲有宰輔之器

懿宗朝韋保衡路巖忌宰相劉瞻誣以罪黜爲荆南節度畋爲制詞云早以文學壘中殊科風稜甚高恭謹無玷又云安數畋之居仍非已有却四方之賄惟恐人知韋路大怒貶畋爲梧州刺史責劉驩州司戶命舍人李庚爲詞深文痛詆必欲加害

屬懿宗厭代僖宗立蕭倣輔政舉瞻自代召歸朝廷至湖南庚典是郡出迎江次牌亭致酒瞻唱竹枝詞送庚酒命庚酬和庚曰不閒音律瞻曰君應只解爲制詞也是夕庚飲鴆而卒

畋字台文相僖宗昭宗爲人仁恕姿采如峙玉

李彙征

彙征客遊閩越至循州冒雨求宿或指韋氏莊居韋氏杖履迎賓年八十餘自稱曰野人韋思明每

與李生談論或詩或史淹留累夕彙征善談而不能屈也論數十家之作次第至李涉詩主人酷稱善彙征遂吟曰遠別秦城萬里遊亂山高下出商州關門不鎖寒溪水一夜潺湲送客愁華表千年一鶴歸丹砂爲頂雪爲衣冷冷僊語人聽盡却向五雲翻翅飛思明復吟二篇曰因韓爲趙兩遊秦十月冰霜渡孟津縱使鷄鳴見關吏不知余也是何人又曰滕王閣上唱伊州二十年前向此遊半

是半非君莫問西山長在水長流韋叟愀然變色
曰老身弱齡不肖浪游江湖交結奸徒爲不平事
後遇李涉博士蒙簡一詩因而跲跡李公待愚擬
陸士衡之薦戴若思中心藏焉遂隱羅浮經于一
紀李旣云亡不復再遊秦楚追惋今昔或潜然乃
持觴而酌反袂而歌云春雨瀟瀟江上村綠林豪
客夜知聞相逢不用相迴避世上如今半是君乾
符辛丑歲范攄客于雲川值彙征細述其事云於

韋叟之居觀李博士手翰云彙征後登進士第按
李涉嘗過九江至皖口遇盜問何人從者曰李博
士也其豪首曰若是李涉博士不用剽奪久聞詩
名願題一篇足矣涉贈一絕云云

劉威

遊東湖處士園林詩云偶向東湖更向東數聲雞
犬翠微中遙知楊柳是門處似隔芙蓉無路通樵
客出來山帶雨漁舟過去水生風物情多與閒相

稱所恨求安計不同
威會昌時詩人也

崔郊

郊寓居漢上有婢端麗善音律既貧鬻婢於連帥
給錢四十一萬寵眄彌深郊思慕無已其婢因寒
食來從事家值郊立於柳陰馬上漣泣誓若山河
崔生贈之以詩曰公子王孫逐後塵綠珠垂淚滴
羅巾侯門一入深如海從此蕭郎是路人或有嫉

郊者寫詩於座公覩詩令召崔生左右莫之測也
及見郊握手曰侯門一入深如海從此蕭郎是路
人便是公作耶遂命婢同歸至於幃幌奩匣悉為
增飭之

來鵬

清明日與友人遊玉粒塘莊詩云幾宿春山逐陸
郎清明時節好烟光歸穿細荇船頭滑醉踏殘花
展齒香風急嶺雲翻迥野雨餘田水落方塘不堪

吟罷東回首滿耳蛙聲正夕陽

寒食山館書情云獨把一杯山館中每經時節恨
飄蓬侵堦草色連朝雨滿地梨花昨夜風蜀魄哭
來春寂寞楚囚吟後月朦朧分明記得還家夢徐
孺宅前湖水東

鄂渚除夜書懷云鸚鵡洲頭夜泊船此時形影共
淒然難歸故國干戈後欲告何人雨雪天筋撥冷
灰書悶字枕陪寒席帶愁眠自嗟落魄無成事明

日春風又一年

杜牧

牧為御史分務洛陽時李司徒愿罷鎮間居聲妓
豪侈洛中名士咸謁之李高會朝客以杜持憲不
敢邀致杜遣座客達意願預斯會李不得已邀之
杜獨坐南行瞪目注視引滿三卮問李云聞有紫
雲者孰是李指之杜凝睇良久曰名不虛得宜以
見惠李俯而笑諸妓亦回首破顏杜又自飲二爵

朗吟而起曰華堂今日綺筵開誰喚分司御史來
 忽發狂言驚滿座兩行紅粉一時迴氣意閒逸旁
 若無人牧不拘細行故詩有十年一覺揚州夢羸
 得青樓薄倖名吳武陵以阿房宮賦薦於崔鄴遂
 登第鄴東都放榜西都過堂牧詩曰東都放榜未
 花開三十三人走馬回秦地少年多釀酒卽將春
 色入關來

青山隱隱水遙遙秋盡江南草木凋二十四橋明

月夜玉人何處學吹簫

寄揚州韓
綽判官

許渾

金陵懷古云玉樹歌殘王氣終景陽兵合戍樓空
 松楸遠近千官塚禾黍高低六代宮石燕拂雲晴
 亦雨江鮑吹浪夜還風英雄一去豪華盡惟有青
 山似洛中

登故洛陽城云禾黍離離半野蒿昔人城此豈知
 勞水聲東去市朝變山勢北來宮殿高鴉噪暮雲

歸古堞雁迷寒雨下空壕可憐緱嶺登仙子猶自
吹笙醉碧桃

又初春雨中舟次和橫江裴使君見迎李趙二秀
才同來因書四韻芳草渡頭微雨時萬株楊柳拂
波垂蒲根水暖雁初下梅逕香寒蜂未知辭客倚
風吹暗淡使君迴馬溼旌旗江南仲蔚多情調悵
望春陰幾首詩

渾睦州人字用晦圍詩之後大中三年任監察御

史以疾乞東歸終郢睦二州刺史

水聲東去市朝變山勢北來宮殿高句何郎翠鳳

雙飛去三十六宮聞玉簫句經年未葬家人散昨

日因齋故吏來句垂釣有深意望山多遠情

雍陶

詠雙白鷺云雙鷺應憐水滿池風飄不動頂絲垂
立當青草人先見行傍白蓮魚未知一足獨拳寒
雨裏數聲相叫早秋時林塘得爾須增價況與詩

家物色宜。

陶蜀川上第後稍薄親黨其舅雲安劉敬之罷舉歸三峽責陶不寄書曰山近衡陽雖少雁水連巴字豈無魚陶得詩悸赧乃有狐首之思後爲簡州牧自比謝宣城柳吳興賓至則折之闈者亦怠投贊者稀得見有馮道明下第請謁云與員外故舊闈者以道明言啓之及引進陶詢曰與公昧平生何云相識道明云誦員外之詩仰員外之德詩集

中日得相見何隔平生也遂吟曰立當青草人先見行傍白蓮魚未知又曰江聲秋入寺雨氣夜侵樓又曰閉門客到常疑病滿院花開不似貧陶聞吟欣狎待道明如曩昔之友君子以雍君矜誇而好媚馮子匪藝而求知

陶字國鈞大中八年自國子毛詩博士出刺簡州天津橋春望云天津橋春水浸紅霞烟柳風絲拂岸斜翠輦不來宮殿閉金鶯街出上陽花。

李遠

失鶴詩云秋風吹却九臯禽一片閒雲萬里心碧
落有情應悵望青天無路可追尋來時白雪翎猶
短去日丹砂頂漸深華表柱頭留語後更無消息
到如今

贈寫御容李長史云玉座塵消硯水清龍髯不動
綵毫輕初分龍準山河秀乍點重瞳日月明宮女
卷簾皆暗認侍臣開殿盡遙驚三朝供奉無人敵

始覺僧繇浪得名

遠字求古大中時爲建州刺史

趙嘏

長安秋望云雲物淒涼拂曙流漢家宮闕動高秋
殘星幾點雁橫塞長笛一聲人倚樓紫豔半開籬
菊靜紅衣落盡渚蓮愁鱸魚正美不歸去空戴南
冠學楚囚

嘏曾有詩曰早晚粗酬身事了水邊歸去一閒人

果卒于渭南尉嘏嘗家于浙西有美姬惑之洎計
偕會中元鶴林之遊浙帥窺其姬遂奄有之明年
嘏及第因以一絕箴之曰寂寞堂前日又曛陽臺
去作不歸雲當時聞說沙吒利今日青娥屬使君
浙帥不自安遣一介歸之嘏方出關逢於橫水驛
姬抱嘏慟哭而卒葬於橫水之陽嘏字承祐
一千里色中秋月十萬軍聲半夜潮

錢塘

韋承貽

承貽字貽之咸通八年登第

省試夜潛紀長句於都堂西南隅云褒衣博帶滿
塵埃獨向都堂納卷回蓬巷幾時聞吉語棘籬何
日免重來三條燭盡鐘初動九轉丹成鼎未開殘
月漸低人擾擾不知誰是謫仙才又云白蓮千朶
照廊明一片昇平雅頌聲報道第三條燭盡南宮
風月寫難成

段成式

成式紀云武宗癸亥三年夏予與張君希復善繼同官祕丘鄭君符夢復連職仙署會假日遊大興善寺因問兩京雜記及遊日記多所遺略乃約一旬尋兩寺以街東興善爲首二記所不具到則別錄之遊及慈恩初知官將併寺僧衆草草乃泛問一二上人及記塔下画跡遊於此遂絕後三年予職于京洛及刺安成至大中七年歸京在外一甲周所留書籍揃壞居半於故簡中覩與二亡友遊寺瀝血淚交當時造適樂事邈不可追復方刊整纔足續穿蠹然十亡五六矣

靖恭坊大興善寺東廊之南素和尚院庭有紫桐四株素之手植元和中卿相遊此院桐至夏有汗汚人衣如軸脂不可浣相國東門鄭相嘗與丞相數人避暑惡其汗謂素曰弟子爲和尚伐此木各植一松也及暮素戲祝曰木我種汝二十餘年汝以汗爲人所惡來歲若復有汗我必薪汝自是無

汗寶曆末予見說已十五六年無汗矣素公不出
院轉法華經三萬七千部夜常有貉子聽經齋時
烏鵲就掌取食長慶初庭前牡丹一朵合歡有僧
玄幽題此院詩警句三萬蓮經三十春半生不踏
院門塵

長樂坊安國寺紅樓睿宗在藩時舞榭東禪院亦
曰木塔院院門西北廊五壁吳道子弟子釋思道
画釋梵八部不施彩色尚有典刑

常樂坊趙景公寺隋開皇三年置本曰弘善寺十
八年改焉南中三門裏東壁上吳道玄白畫地獄
變筆力勁怒變狀陰怪觀之不覺毛戴吳畫中得
意處三階院西廊下范長壽畫西方變及十六觀
寶池尤妙絕諦視之覺水入浮壁院門上白畫樹
石頗似閻立德子携立德行天祠粉本驗之西中
三門裏門南吳生畫龍及刷天王鬚筆蹟如鐵有
執爐天女竊眸欲語

辭吳畫聯句 慘淡十堵內吳生縱狂跡風雲將

逼人鬼神如脫壁 柯其中龍最怪張甲方汗栗黑

雲夜窸窣焉知不霹靂 繼此際忽僊子獵獵衣鳥

奕妙瞬乍疑生參差奪人魄 夢往往乘猛虎衝梁

聳奇石蒼峭束高泉角膝驚欺側 柯冥獄不可視

毛戴腋流液苟能水成河刹那沉火宅

通政坊寶應寺韓幹藍田人少時常為酒家送酒

王右丞兄弟未遇每貫酒漫遊幹常徵債于王家

戲畫地為人馬右丞精思丹青奇其意趣乃歲與

錢二萬令學畫十餘年今寺中釋梵天女悉齊公

妓小小等寫真也寺有韓幹畫下生彌勒衣紫袈

裟右邊仰面菩薩及二獅子尤入神又有舊鐵石

及齊公喪一歲子漆之如羅喉羅每盆供日出之

寺中彌勒殿齊公寢堂也東廊北面楊岫之畫鬼

神齊公嫌其筆蹟不工

平康坊菩薩寺佛殿東西障日及諸柱上圖畫是

東廊跡舊鄭法士畫開元中因屋壞移入大佛殿
內北壁食堂前東壁上吳道玄畫智度論色偈變
偈是吳自題筆蹟遒勁如磔鬼神毛髮次堵畫禮
佛仙人天衣飛揚滿壁風動佛殿內後吳道玄
畫消災經事樹石古嶮元和中上欲令移之慮其
摧壞乃下詔擇畫手寫進佛殿內槽壁維摩變舍
利佛角膝而轉元和末俗講僧文淑裝之筆蹟盡
矣故興元鄭公尚書題北壁僧院詩曰但慮綵色

汚無虞壁脾肥置寺碑陰雕飭奇巧相傳鄭法士
初起樣也初會覺上人以利施起宅十餘畝工畢
釀酒百石列餅甕於兩廊下引吳道玄觀之因謂
曰檀越爲我畫以是賞之吳生嗜酒且利其賞欣
然而許予以蹤跡似不及景公寺畫中三門內東
門神善繼云是吳生弟子王耐兒之手也
翊善坊保壽寺本高力士宅天寶九載捨爲寺初
鑄鐘成力士設齋慶之舉朝畢至一擊百千有規

其意連擊二十杵經藏閣規創危巧二塔火珠受
十餘斛河陽從事李涿性好竒古與僧智增善嘗
俱至此寺觀庫中舊物忽於破甕中得物如被幅
裂汚塗觸而塵起涿徐視之乃畫也因以州縣圖
三及縑三十獲之令家人裝治之大十餘幅訪於
常侍柳公權方知張萱所畫石橋圖也玄宗賜力
士因留寺中後爲鬻畫人宗牧言於左軍尋有小
使領軍卒數十人至宅宣勅取之卽日進入先帝

好古見之大悅命張於雲韶院寺見有先天菩薩
真本起成都妙積寺開元初有尼魏八師者常念
大悲呪雙流縣百姓劉乙意兒年十一自欲事魏
尼尼遣之不去常與室立禪嘗白魏云先天菩薩
見身此地篩灰于庭一夕有跡巨數尺輪理成就
因謁画工隨意設色悉不如意有僧楊法成自言
能画意兒常合掌瞻仰然後指授之以匠十稔工
方就後塑先天菩薩凡二百四十首首如塔勢分

臂如意蔓其膀子有一百四十曰鳥樹一鳳四翅
水肚樹所題深怪不可詳悉画樣凡十五卷柳七
師者崔寧之甥分三卷往上都流行時魏奉古爲
長史進之後因四月八日賜高力士今成都者是
其次本

崇仁坊資聖寺淨土院門外相傳吳生一夕秉燭
醉画就中戟手視之惡駭院門裏盧稜伽常學吳
勢吳亦授以手訣乃画總持三門寺方半吳大賞

之謂人曰稜伽不得心訣用思太苦其能久乎画
畢而卒中門牕間吳画高僧韋述贊李嚴書中三
門外兩面上層不知何人画人物頗類閻令寺西
廊北隅楊恒画迎塔天文明睇將瞬團塔院北堂
有鐵觀音長三丈餘觀音院兩廊四十二賢聖韓
幹画元中書贊東廊北頭散馬不羣見者如將嘶
蹠聖僧中龍樹商那和修絕妙團塔上菩薩李真
画四面花鳥邊鸞画藥師菩薩頂上莪葵尤佳塔

中藏千部妙法蓮華經

成式字柯古文昌之子博學強記多奇篇秘籍常於私第鑿池得片鐵命尺周量之笑而不言寘之密室時窺之則有金書小字報十二時也其博物類此終太常少卿

酉陽雜俎云一夕予坐客以遞送聯句爲煩乃命工取細斑竹以白金鍍首如茶挾次遞聯名之予在城時常與客聯句初無虛日小酌求押或窮韻

相角或押惡韻或煎茗一盞爲八韻詩謂之雜聯若志於不朽則汰揀穩韻無所得輒已謂之苦聯聯共押平聲好韻不僻者出於竹簡謂之韻牒出城悉攜行坐客句挾韻牒之語必爲好事者所傳矣因說故相牛公揚州賞秀才蒯希逸詩云蟾蜍醉裏破蛺蝶夢中殘每坐吟之予因請坐客各吟近日爲詩者佳句有吟賈島舊國別多日故人無少年馬戴猿啼洞庭樹人在木蘭舟又骨銷金鏃

在有吟僧無可河來當塞斷一日山一日遠與沙

平又開門落葉深有吟張祐河流側讓關一日又

泉聲到池盡有吟僧靈準詩晴看漢水廣秋覺峴

山高有吟米景玄塞鴻先秋去邊草入夏生予吟

上都僧元礎寺隔殘潮去又採藥過泉聲又林塘

秋半宿風雨夜深來予識蜀中客龐季子每云寒

雲生易滿秋草長難高

韋蟾

蟾廉問鄂州罷賓僚祖餞蟾曾書文選句云悲莫

悲兮生別離登山臨水送將歸以牋毫授賓從請

續其句逡巡有妓泫然起曰某不才不敢染翰欲

口占兩句韋大驚異令隨念云武昌無限新栽柳

不見楊花撲面飛坐客無不嘉歎韋令唱作楊柳

枝詞

蟾字隱桂下杜人大中七年進士登第初為徐商

掌書記終尚書左丞

贈商山僧云商嶺東西路欲分兩間茅屋一溪雲
師言耳重知師意人非不欲聞

李敬方

天台閒望云天台十二旬一片雨中春林果垂秋
盡山苗半夏新暘烏曉展翅陰魄夜飛輪坐冀無
雲物分明見北辰

勸酒云不向花前醉花應解笑人只憂連夜雨又
過一年春

汴河直進船云汴水通淮利最多生人爲害亦相
和東南四十三州地取盡脂膏是此河

敬方字中虔登長慶進士第大和中爲歙州刺史
大中時顧陶集唐詩類選云李歙州敬方才力周
備興比之間獨與前輩相近家集三百首簡擇律
韻八篇而已雖前後復絕或畏多言而典刑具存
非敢避棄

李郢

奉陪裴相公重陽日遊安樂池亭云絳霄輕靄翊
 三台嵇阮情懷管樂才蓮沼昔為王儉府菊籬今
 作孟嘉杯寧知北闕元勳在漢陽蕭何等却引東
 山舊客來自笑吐茵還酪酏日斜空從錦衣回
 贈羽林將軍云虬髯顛顛羽林郎曾入甘泉侍玉
 皇鵬沒夜雲知御苑馬隨仙仗識天香五湖歸去
 孤舟月六國平來兩鬢霜惟有桓伊江上笛卧吹
 三弄送殘陽

郢字楚望大中進士終於御史

杜牧之湖南正初招郢云行樂及時時已晚對酒
 當歌歌不成千里暮雲重疊翠一溪寒水淺深清
 高人以飲為心事浮世除詩盡強名看着白蘋牙
 欲吐雪舟相訪勝閒行

李洞

上崇賢曹郎中云閒坊宅枕穿宮水聽水分衾盡
 蜀僧藥杵聲中搗殘夢茶鐙影裏煮孤燈刑曹樹

映千年井華岳樓開萬里米詩句變風官漸緊夜
濤春盡海邊藤

洞唐諸王孫也嘗遊西川慕賈浪仙爲詩鑄銅像
其儀事之如神洞爲終南山詩二十韻句有殘陽
高照蜀敗葉遠浮涇復曰劔竹烟嵐凍偷湫雨雹
腥遠平丹鳳闕冷射五侯廳贈司空侍郎云馬飢
餐落葉鶴病曬殘陽又曰卷箔清谿月敲松紫閣
書又送僧云越講迎騎象蕃齋懺射鵬上高僕射

曰征南破虜漢功臣提劔歸來萬里身閒倚凌烟
金柱看形容消瘦老於真復曰藥杵聲中搗殘夢
茶鐺影裏煮孤燈送人歸東南云島嶼分諸國星
河共一天時人但謂其僻澁而不能貴其奇峭唯
吳子華深知之子華才力浩大八面受敵以韻著
稱遊刃頗攻騷雅嘗以百篇示洞洞曰大兄所示
百篇中有一聯絕唱西昌新亭曰暖漾魚遺子晴
遊鹿引麕子華不怨所鄙而喜所許

洞三榜裴公第二榜策夜簾前獻詩云公道此時
 如不得昭陵慟哭一生休尋卒蜀中裴公無子人
 謂屈洞所致裴公贊也洞慕賈島鑄其像頂戴常
 念賈島佛

送僧遊南海云春往海南邊秋闌半路蟬鯨吞洗
 鉢水犀觸點燈船島嶼分諸國星河共一天長空
 却歸日松偃舊房前

長孫翱

長孫翱朱慶餘各有宮詞翱詞曰一道甘泉接御
 溝上皇行處不曾秋誰言水は無情物也到宮前
 咽不流朱曰寂寂花時閉院門美人相對泣瓊軒
 含情欲說宮中事鸚鵡前頭不敢言

崔魯

華清宮詩云銀河漾漾月輝輝樓礙星邊織女機
 橫玉叫雲清似水滿空霜逐一聲飛
 門橫金鎖悄無人落日秋聲渭水濱紅葉下山寒

寂寂溼雲如夢雨如塵

岸梅云含情含怨一枝垂斜壓漁家短短籬惹袖
尚餘香半日向人如訴雨多時初開遍稱雕梁画
未落先愁玉笛吹行客見來無去意解帆烟浦爲


題詩

高蟾

鄭谷贈詩云張生故國三千里知者惟應杜紫微
君有君恩秋後葉可能更羨謝玄暉蓋蟾有宮詞

云君恩秋後葉日向人疎

蟾初落第詩云天上碧桃和露種日邊紅杏倚雲
栽芙蓉生在秋江上莫向春風怨未開胡曾亦有
下第詩云翰苑何時休嫁女文昌早晚罷生兒上
林新桂年年發不許平人折一枝時謂蟾無躁競
心後登第乾符中爲中丞



全唐詩話卷之四 終

